

Umhverfis- og auðlindaráðuneytið
Skuggasundi 1
150 REYKJAVÍK

Reykjavík, 20. febrúar 2015
Tilvísun: 2014090007/21.0
Verknúmer: 3241005

Efni: Tilhögun virkjunarkosta til umfjöllunar hjá verkefnisstjórn 3. áfanga rammaáætlunar - önnur áfangaskil

Ráðuneyti umhverfis- og auðlindamála hefur gefið út reglugerð nr. 530/2014 um virkjunarkosti í verndar- og orkunýtingaráætlun (rammaáætlun), sem birtist í B-deild Stjórnartíðinda 5. júní sl.. Reglugerðin nær til landssvæða þar sem er að finna virkjunarkosti til orkuvinnslu og byggir hún á lögum nr. 48 frá árinu 2011.

Orkustofnun kallaði með auglýsingu haustið 2013 eftir beiðnum um að verkefnisstjórn fjalli um virkjunarkosti í samræmi við 9. gr. laganna. Samkvæmt þriðju grein reglugerðarinnar þurfa ýmis gögn að fylgja beiðni um umfjöllun um virkjunarkost og eru gögnin mismunandi eftir því um hvers konar virkjun er að ræða.

Með bréfi þessu kemur Orkustofnun á framfæri og leggur sjálf til tiltekinn fjölda virkjunarkosta fyrir verkefnisstjórn til umfjöllunar og er um áfangaskil að ræða á þeim virkjunarkostum sem nánast eru fullunnir, sbr. gögn sem send verða með afriti af bréfi þessu í tölvupósti auk þess sem þeim hefur verið komið fyrir á heimasíðu Orkustofnunar á vefsvæðinu:

<http://www.os.is/raforka/rammaaetlun/erindi-til-verkefnisstjornar-rammaaetlunar-3/>

Gögnin sem lögð eru fram lýsa tilhögun virkjunarkosta og eru enn í formi skýrsludraga, þar sem endanlegt snið á skýrslunni, skýrslunúmer og númer á köflum liggja ekki fyrir. Einnig hefur Orkustofnun ekki unnið kostnaðarflokkagreiningu fyrir þá virkjanakosti sem stofnunin leggur sjálf fram né hefur gefist tími til að rýna kostnaðarflokkagreiningu frá orkufyrirtækjunum. Öll aðalatriði varðandi tilhögun virkjunarkostanna liggja þó fyrir og ættu tilgreindar forsendur þess að um drög er að ræða ekki að hamla vinnu verkefnisstjórnar við þá kosti sem hér eru lagðir fram.

Rétt er að taka fram að Orkustofnun telur við nánari athugun að lög nr. 48/2011 nái ekki með ótvíráðum hætti til vindorku almennt eða sjávarfallaorku utan netlaga sbr. minnisblað sem sent var til umhverfis- og auðlindaráðuneytis þann 29. október s.l. (tilvísun 2014010025). Því verða vindorkukostir, sem Orkustofnun hafði sjálf byrjað undirbúning á, ekki sendir verkefnisstjórn til umfjöllunar í 3. áfanga rammaáætlunar. Þó ber að geta þess að vegna réttaróvissu um skoðun Orkustofnunar, m.a. vegna túlkunar umhverfis- og auðlindaráðuneytis, munu virkjunarkostir í vindorku við Blöndulón og við Búrfell verða sendir verkefnisstjórninni, óski Landsvirkjun þess til að tryggja réttaröryggi sitt varðandi þá virkjunarkosti. Sú ósk liggur þó enn ekki fyrir og að mati Orkustofnunar er óljóst hvernig skilgreina beri slíkan virkjunarkost með vísan til lagaheimilda.

Þegar reglugerð nr. 530/2014 lá fyrir vann stofnunin leiðbeinandi upplýsingar um hvernig skilgreina skyldi virkjunarkosti. Þessar leiðbeinandi upplýsingar eru jafnframt fyrstu drög að þeirri skýrslu sem skilað verður til verkefnisstjórnar 3. áfanga rammaáætlunar og liggja þessi gögn á vefsvæðinu:

<http://www.os.is/raforka/rammaaetlun/upplýsingar-um-virkjunarkosti/>

Þann 14. nóvember 2014 kallaði Orkustofnun eftir upplýsingum frá orkufyrirtækjum um tilhögun virkjunarkosta í samræmi við ofangreindar leiðbeinandi upplýsingar. Farið var fram á að gögnum yrði skilað til stofnunarinnar eigi síðar en 31. desember 2014. Flestir aðilar sóttu um frest á skilum en

B.B.P.
Jk.R.

Þann 12. janúar s.l. höfðu stofnuninni borist gögn vegna tilhögunar 43 virkjunarkosta. Töldust gögn vegna 25 virkjunarkosta fullnægjandi en gerðar voru athugasemdir vegna 18 virkjunarkosta og voru þeir virkjunarkostir settir í frekari í vinnslu hjá orkufyrirtækjunum. Einn þessara kosta, Bjallavirkjun, var þó dæmdur úr leik af Orkustofnun í ljósi þess að framkvæmdir vegna hans færu inn á friðlýst svæði, sbr. bréf Orkustofnunar til Landsvirkjunar dags. 10. febrúar 2015 auk þess sem útfærsla á Skatastaðavirkjun B var dregin til baka. Gögn vegna Hellisheiðarvirkjunar sýndu að ekki er um nýjan virkjunarkost að ræða heldur aðeins aukna vinnslu í sömu virkjun, því verður Hellisheiði ekki lögð fram sem virkjunarkostur.

Orkustofnun skilaði upplýsingum um tilhögun 50 virkjunarkosta þann 20. janúar 2015, dró síðan þrjá kosti til baka þar sem í ljós kom að þeir voru á friðlýstu svæði, en skilar nú inn 33 virkjunarkostum til viðbótar, auk 2 virkjunarkosta sem hafa verið lagfærðir frá því 20. janúar. Samtals eru gögn vegna 81 virkjunarkosta tilbúin til umfjöllunar hjá verkefnisstjórn rammaáætlunar þar af eru 47 virkjunarkostir í vatnsafla og 33 í jarðvarma.

Eftir stendur einn virkjunarkostur sem vænta má að skilað verði til verkefnisstjórnar fyrir lok mars.

Gögn vegna virkjunarkosta sem tilgreindir eru í erindi þessu voru annars vegar afhent á minniskubbum annars vegar á fundi með verkefnisstjórn þann 20. janúar 2015 og hins vegar samhliða afhendingu á þessu erindi á fundi með sömu verkefnisstjórn þann 20. febrúar 2015.

Á áður nefndu vefsvæði:

<http://www.os.is/raforka/rammaaetlun/erindi-til-verkefnisstjornar-rammaaetlunar-3/>

er að finna skilgreiningar á tilhögun virkjunarkosta ásamt skjali sem gefur yfirsýn yfir stöðu skilgreininga á tilhögun einstakra virkjunarkosta.

Orkustofnun áskilur sér rétt til uppfærslu og leiðréttingar á skýrsludrögum eftir því sem þurfa þykir, þar til endanleg útgáfa verður gefin út í heild, og verður verkefnisstjórn upplýst um mögulegar breytingar jafnóðum.

Virðingarfyllst
f. h. orkumálastjóra


Erla Björk Þorgeirsdóttir


Skúli Thoroddsen